

之教本院不識前規故言之此非厭薄臺諫之意也今後爾等亦須察為○備邊司啓曰適變時扈從人中未及論賞者尚有一百六十七人朝廷官爵有限勢難一時除授而宜量其人器隨闕填差不可置之相忘之域也募兵人等厥數亦多勢難一時施賞而其中玉果居前正沈民覺募兵九百餘名祇謁于天安靖陵參奉閔裕中領率陵軍三十餘名陳疏赴難並令該曹依扈從人例施賞宜當從之○下教于政院曰觀副護軍金尚憲所撰海平府院君尹根壽行狀則其中有時相與按獄大臣有郄陰結嬖倖用蜚語眩惑宮禁遂起鉤黨之禍名卿賢士貶竄殆盡公亦落職退居廣州村舍之語予竊瞿然薄其為人意者先朝必無如此之理設有是事如使為是說者少知為親者諱之之道則其言必無如是之薄也况已丑治獄之偏彼此皆言以此觀之則當時之人亦不可謂無偏無黨此豈宮禁之咎也此是請謚行狀當為啓下文字與士大夫間私相著述不同此公事還出給○夜坤方有氣如火光白雲一道起自巽方指艮方長數十丈